

CONVENIO DE COLABORACIÓN ENTRE A VICEPRESIDENCIA PRIMEIRA E CONSELLERÍA DE PRESIDENCIA, XUSTIZA E DEPORTES, A CONSELLERÍA DE POLÍTICA SOCIAL E XUVENTUDE DA XUNTA DE GALICIA E O CONSELLO DA AVOGACÍA GALEGA PARA O DESENVOLVEMENTO DO PROGRAMA DE MEDIACIÓN FAMILIAR INTRAXUDICIAL PARA O ANO 2023.

No lugar e na data de sinatura dixital

REUNIDOS

Dunha parte:

D. Diego Calvo Pouso, vicepresidente Primeiro e conselleiro de Presidencia, Xustiza e Deportes, que actúa en representación da Xunta de Galicia de conformidade co disposto no artigo 34 da Lei 1/1983, do 22 de febreiro, de normas reguladoras da Xunta e da súa Presidencia, no Decreto 60/2022, do 15 de maio, polo que se nomean aos titulares das vicepresidencias e consellerías da Xunta de Galicia, o Decreto 59/2023, do 14 de xuño, polo que se establece a estrutura orgánica da Xunta de Galicia, o Decreto 79/2023, do 22 de xuño, polo que se fixa a estrutura orgánica das vicepresidencias e das consellerías da Xunta de Galicia, e o Decreto 117/2022, do 23 de xuño, polo que se establece a estrutura orgánica da Vicepresidencia Primeira e Consellería de Presidencia, Xustiza e Deportes.

Dona Fabiola García Martínez, conselleira de Política Social e Xuventude, actuando en nome e representación da Consellería de Política Social e Xuventude, no uso das facultades que lle atribúe o artigo 34 da Lei 1/1983, do 22 de febreiro, de normas reguladoras da Xunta e da súa Presidencia, o Decreto 60/2022, do 15 de maio do seu nomeamento, o Decreto 59/2023, do 14 de xuño, polo que se establece a estrutura orgánica da Xunta de Galicia e o Decreto 124/2022, do 23 de xuño, polo que se establece a estrutura orgánica da Consellería de Política Social e Xuventude.

E doutra parte:

Don Augusto José Pérez-Cepeda Vila, presidente do Consello da Avogacía Galega segundo acordo do Pleno do Consello do 07.09.2023 do seu nomeamento, actuando en nome e representación deste, en virtude do artigo 10 do Decreto 130/1993, de 3 de xuño, polo que se aproba a creación e se establecen os estatutos do Consello da Avogacía Galega

As partes, no nome e representación en que concorren e coa capacidade legal para este acto,



Ambas as dúas partes recoñécense mutuamente capacidade para obrigarse nos termos deste acordo de colaboración

EXPOÑEN:

Primeiro. Todos os órganos e entidades participantes neste convenio teñen interese común na promoción e desenvolvemento da mediación como vía complementaria de solución de conflitos que pon ao alcance das partes implicadas novas ferramentas que lles permitan lograr solucións satisfactorias ás súas pretensións.

Segundo. As administracións públicas poden celebrar convenios de colaboración con outras entidades públicas, así como con persoas xurídicas suxeitas ao dereito privado, ao abeiro do disposto no artigo 6.2 da Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, na Lei 40/2015, do 1 de outubro, do réxime xurídico do sector público e do disposto no Acordo do Consello da Xunta do 27 de marzo de 1991, sobre convenios de cooperación con outros entes públicos e de colaboración con particulares, feito público por resolución da Consellería de Economía e Facenda do 8 de abril de 1991.

Terceiro. Á Vicepresidencia Primeira e Consellería de Presidencia, Xustiza e Deportes correspóndenlle, entre outras, as competencias en materia de implantación, impulso e desenvolvemento de programas e actuacións de desxudicialización de conflitos e de promoción da mediación, tal e como establece o Decreto 117/2022, do 23 de xuño, polo que se establece a súa estrutura orgánica.

Cuarto. A Consellería de Política Social e Xuventude, consonte o Decreto 124/2022, do 23 de xuño, polo que se establece a súa estrutura orgánica, ten asumidas entre as súas competencias a xestión das políticas autonómicas en materia de acción social de apoio á familia, segundo o disposto na Lei 13/2008, do 3 de decembro, de servizos sociais de Galicia e na Lei 3/2011, do 30 de xuño, de apoio á familia e á convivencia de Galicia e, en concreto, as competencias de mediación familiar derivadas da Lei 4/2001, do 31 de maio, reguladora da mediación familiar e do Decreto 159/2003, do 31 de xaneiro, polo que se regula a figura do mediador familiar, o Rexistro de Mediadores Familiares de Galicia e o recoñecemento da mediación gratuíta.

Quinto. O Consello da Avogacía Galega é unha corporación de dereito público con personalidade xurídica propia e plena capacidade integrada por os sete colexios de avogados da Comunidade Autónoma que ten entre as súas funcións, coordinar os colexios integrados nel e asumir a súa representación nas cuestións de interese común perante a Xunta de Galicia, sen prexuízo da autonomía e competencia de cada colexio, de acordo co establecido no artigo 4 do seu estatuto aprobado por Decreto 130/1993, do 3 de xuño, polo que se aproba a creación do Consello da Avogacía Galega.



Sexto. As partes coinciden na necesidade de difundir a mediación familiar como unha técnica de resolución de conflitos e máis concretamente para o ámbito familiar, como un proceso no que a parella acepta a intervención neutral e cualificada dunha terceira persoa, a mediadora familiar, que tratará de que atopen por si mesmas un acordo duradeiro e mutuamente aceptable considerando as necesidades de cada membro da familia e especialmente as das persoas menores de idade, dentro dun espírito de responsabilidade compartida e de igualdade dos proxenitores.

A mediación como procedemento pode dar solución extraxudicial dun modo áxil e eficaz aos conflitos mediante procedementos adaptados ás partes. Nesta liña se pronúnciase a Directiva 2008/52/CE do Parlamento Europeo e do Consello da Unión Europea, do 21 de maio de 2008, sobre certos aspectos da mediación en asuntos civís e mercantís que, no seu artigo 3 a define como un procedemento estruturado, sexa cal sexa o seu nome e denominación, no que dúas ou máis partes en conflito tentan voluntariamente alcanzar por si mesmas un acordo sobre a resolución do seu litixio coa axuda dun mediador, procedemento que pode ser iniciado polas partes, suxerido ou ordenado por un órgano xurisdiccional ou prescrito polo Dereito dun Estado membro.

Neste sentido considérase que a mediación Intraxudicial, aquela que se leva a cabo cando o proceso xudicial xa está iniciado, resultaría ser unha metodoloxía adecuada e válida para resolver unha porcentaxe significativa de procesos xudiciais, sobre todo naqueles casos en que as dúas partes deberán continuar relacionándose no futuro por teren intereses comúns, o que se adapta á perfección aos casos dos procesos de ruptura familiar con descendentes menores.

Sétimo. Para dotar da maior eficacia ao proceso de mediación no ámbito intraxudicial, considérase que se debe prestar a través dun equipo de xuristas que poidan resolver os problemas de achegamento e enfoque das partes en conflito, con vistas a acadar o clima necesario para achegar posturas e facilitar acordos.

É por iso que para implantar o programa de mediación intraxudicial nos sete colexios de avogados de Galicia tendo en conta a especificidade das actuacións que comporta e os requisitos da figura do mediador recollidos tanto na Lei 4/2001, do 31 de maio, como no Decreto 159/2003, do 31 de xaneiro, resulta imprescindible a colaboración do Consello da Avogacía Galega como encargado de coordinar a acción conxunta dos colexios de avogados de A Coruña, Ferrol, Santiago de Compostela, Lugo, Ourense, Pontevedra e Vigo que o integran, e asumir a súa representación así como as relacións cos órganos da Administración Autonómica, de acordo co artigo 4 dos seus estatutos.

O desenvolvemento do programa de mediación intraxudicial con carácter exclusivo por parte dos Colexios de Avogados, e a labor de coordinación dos colexios integrados nel que leva a cabo o Consello da Avogacía Galega, asumindo a súa representación nas cuestións de interese común dos colexios, xustifica a necesidade de acudir á sinatura dun convenio de colaboración con esta Corporación de dereito público e fai que non



sexa posible promover a concorrência pública para a concesión dunha subvención para este fin.

Por todo o exposto, as partes acordan asinar o presente convenio de colaboración con base nas seguintes,

CLÁUSULAS:

Primeira. *Obxecto do convenio.*

O obxecto do presente convenio é establecer as condicións polas que se rexerá a colaboración entre a Xunta de Galicia a través da Vicepresidencia Primeira e Consellería de Presidencia, Xustiza e Deportes, a Consellería de Política Social e Xuventude, e o Consello da Avogacía Galega, a través da concesión directa dunha subvención pública para o desenvolvemento dun programa de mediación intraxudicial familiar gratuíta nos colexios de avogados da Coruña, Santiago de Compostela, Ferrol, Lugo, Ourense, Pontevedra e Vigo.

O programa consistirá na prestación dun servizo de mediación por unha persoa que exerza a avogacía, proposta por cada colexio.

Segunda. *Características do programa de mediación*

1. O programa de mediación realízase ao abeiro do cumprimento dos principios esenciais do proceso de mediación. Así, ao abeiro da Lei 4/2001, do 31 de maio e do Decreto 159/2003, do 31 de xaneiro; a actuación do servizo de mediación do Colexio rexerase polos seguintes principios:

a) Voluntariedade. Respetarase en todo caso o principio de voluntariedade na aceptación do proceso de mediación.

b) Confidencialidade. Toda información obtida no transcurso da mediación estará afectada polo deber de segredo e polo seu carácter confidencial, estando en consecuencia tanto as partes coma a persoa que leva a cabo o labor de mediación obrigadas a manter reserva sobre o desenvolvemento do procedemento negociador.

A información que se utilice no procedemento de mediación permanecerá reservada e unicamente se informará ao xulgado sobre a consecución ou non dun acordo. No caso de que a mediación non continúe, por desistir algunha das partes, unicamente se informará a xuíza/xuíz deste feito, que carecerá de toda incidencia no axuízamento posterior.

En todo caso, a persoa mediadora está obrigada a informar inmediatamente ao xuíz/ xuíza ou ao Ministerio Fiscal dos datos que puidesen revelar a existencia dunha ameaza para a vida ou a integridade física ou psíquica dalgunha persoa, ou de calquera feito delituoso.



c) Igualdade das partes. Garantirase a plena igualdade e liberdade das partes, interrompéndose a mediación cando se advirta a existencia de calquera indicio de violencia ou de intimidación, ou calquera outra causa que rompa este principio.

d) Homologación de acordos. A persoa mediadora comunicará ao xulgado, para os efectos de constancia, a finalización da mediación, indicándolle se se alcanzou ou non un acordo total ou parcial, ou se finalizou por calquera outra causa. Así mesmo, respectará o principio de confidencialidade do acordo de mediación e entregará un exemplar deste a cada unha das partes, reservando para si outro a persoa mediadora para a súa conservación.

A persoa mediadora informará as partes de que poden instar a homologación xudicial do acordo alcanzado co obxecto de configuralo como un título executivo.

Concluída a mediación con éxito, o acordo de mediación servirá de base para a redacción do convenio regulador, conforme dispón a lexislación civil, que necesariamente haberá que presentar no procedemento correspondente de divorcio, separación ou relacións paterno-filiais, ben na súa regulación inicial ou no seu ulterior proceso de modificación de medidas, no que se pedirá a súa transformación a mutuo acordo. En todo caso, o proceso deberá concluír por sentenza.

2. As persoas mediadoras deben cumprir os requisitos previstos na Lei 4/2001, do 31 de maio, de mediación familiar e no Decreto 159/2003, do 31 de xaneiro, polo que se regula a figura do mediador familiar, o rexistro de mediadores familiares de Galicia e o recoñecemento da mediación familiar gratuíta.

Unha vez iniciado un proceso de mediación, este será impulsado pola mesma persoa profesional que leva a cabo a mediación, ata a súa finalización.

A subscrición do presente convenio non comporta relación laboral, contractual ou de calquera outro tipo entre as persoas mediadoras que vaian desenvolver as actividades e a Xunta de Galicia.

3. A persoa mediadora do programa desenvolverá o seu labor, como mínimo, durante dous días á semana.

As persoas que desenvolvan as actuacións de mediación recibirán do Consello da Avogacía Galega unha retribución mensual por un montante fixo, con independencia do número de procesos de mediación atendidos.

Co obxecto de conseguir a maior eficacia, establécese unha duración non superior a un mes para o proceso de mediación, que se computará desde a celebración da primeira sesión co equipo mediador unha vez aceptada a mediación, sen prexuízo da posibilidade de prórroga a instancia das partes, de forma xustificada, por un mes



máis. Excepcionalmente, podería establecerse unha prórroga por un prazo superior cando se xustifique debidamente.

En todo caso o proceso de mediación non poderá exceder os tres meses.

4. A persoa mediadora estará sometida ao cumprimento do réxime de incompatibilidade que obrigará a renunciar á realización da mediación, ademais dos previstos no artigo 6 do Decreto 159/2003, do 31 de xaneiro, e dos previstos no artigo 13 da Lei 5/2012, do 6 de xullo, de mediación en asuntos civís e mercantís, nos supostos seguintes:

a) Ter vínculo de parentesco por consanguinidade ou afinidade ata o cuarto grao con algunha das partes intervinientes na mediación, ou cos seus asesores, representantes legais ou mandatarios, así como compartir o despacho profesional ou estar asociada con estes para o asesoramento, a representación ou o mandato.

b) Intervir profesionalmente con anterioridade no asunto obxecto de mediación.

c) Ter interese directo, de calquera tipo, no asunto obxecto da súa actuación, ou unha manifesta vinculación directa ou indirecta, económica, laboral ou doutro tipo que poida comprometer a súa independencia profesional.

d) Estar adscrita aos gabinetes de orientación familiar, aos servizos de familia e menores ou aos servizos de dependencia e autonomía persoal das xefaturas territoriais; á Dirección Xeral de Familia, Infancia e Dinamización Demográfica; á Dirección Xeral de Inclusión Social; á Dirección Xeral de Maiores e Atención Sociosanitaria, a Dirección xeral de Persoas con Discapacidade ou á Secretaría Xeral Técnica da Consellería de Política Social e Xuventude

e) Calquera outro suposto establecido legal ou regulamentariamente.

5. A baixa das/os profesionais que formen parte do programa de mediación como integrantes da lista de mediadores do Consello Galego, ademais da voluntaria, será polas causas seguintes:

a) A perda da condición de colexiada/o.

b) O incumprimento das condicións ou compromisos do convenio.

c) A incoación de procedemento penal ou expediente disciplinario.

d) A actuación a sabendas da existencia de incompatibilidade.

e) O rexeitamento inxustificado da realización das tarefas encomendadas.



Terceira Obrigas dos beneficiarios

1. Para poder ser destinatarios das axudas, os beneficiarios deberán cumprir **os requisitos sinalados no artigo 10 da Lei 9/2007**, do 13 de xuño, de subvencións de Galicia, que a seguir se relacionan:

- a) Non ter sido condenados mediante sentenza firme á pena de perda da posibilidade de obter subvencións ou axudas públicas.
- b) Non ter solicitado a declaración de concurso, non ter sido declarados insolventes en ningún procedemento, non ter sido declarados en concurso, salvo que neste tivera adquirido a eficacia dun convenio, non estar suxeitos a intervención xudicial ou ser inhabilitados conforme ao Real Decreto Lexislativo 1/2020, do 5 de maio, polo que se aproba o texto refundido da Lei concursal, sen que conclúa o período de inhabilitación fixado na sentenza de cualificación do concurso.
- c) Non estar incursos, aqueles que ostenten a representación legal doutras persoas xurídicas, nalgún dos supostos de incompatibilidades que estableza a normativa vixente.
- d) Estar ao corrente de pagamento de obrigas por reintegro de subvencións nos termos que regulamentariamente se determine.
- e) Non ter sido sancionados mediante resolución firme coa perda da posibilidade de obter subvencións segundo o establecido na Lei 9/2007, do 13 de xuño ou a Lei 58/2003, do 17 de decembro, xeral tributaria.

2. Así mesmo, deberán cumprir, coas obrigas establecidas no artigo 11 da Lei 9/2007, do 13 de xuño e que son, entre outras, as seguintes:

- a) Cumprir o obxectivo, executar o programa, realizar a actividade ou adoptar o comportamento que fundamenta a concesión.
- b) Someterse ás actuacións de comprobación que deba efectuar a Consellería de Política Social e Xuventude, así como calquera outra comprobación e control financeiro que poidan realizar os órganos de control competentes, tanto nacionais como comunitarios, e achegar tanta información lle sexa requirida no exercicio das actuacións anteriores.



c) Comunicar á Consellería de Política Social e Xuventude, a obtención doutras subvencións, axudas, ingresos ou recursos que financien as actividades subvencionadas, así como a modificación das circunstancias que fundamentasen a concesión da subvención. Esta comunicación deberá efectuarse tan axiña como se coñeza e, en todo caso, con anterioridade á xustificación da aplicación dada aos fondos percibidos.

d) Acreditar que están ao corrente das súas obrigas tributarias e fronte á Seguridade Social, e de que non ten pendentes de pagamento débedas coa comunidade autónoma.

O cumprimento destes requisitos poderán ser comprobados pola consellería agás oposición expresa da entidade beneficiaria. No caso de oposición, deberán achegarse os certificados correspondentes ou ben presentar unha declaración de conformidade co disposto no artigo 31.7 da Lei 9/2007, do 13 de xuño.

e) Dar unha adecuada publicidade do carácter público do financiamento do investimento obxecto de subvención. As medidas de difusión deberán adecuarse ao obxecto subvencionado, tanto na súa forma coma na súa duración, e poderán consistir na inclusión da imaxe institucional da entidade concedente, así como en lendas relativas ao financiamento público en carteis, placas conmemorativas, materiais impresos, medios electrónicos ou audiovisuais, ou ben en mencións realizadas en medios de comunicación.

f) Proceder ao reintegro dos fondos percibidos nos supostos previsto no artigo 33 da Lei 9/2007, do 13 de xuño.

3. As entidades beneficiarias debe cumprir coa obriga de subministración de información nos termos establecidos no artigo 4 da Lei 1/2016, do 18 de xaneiro, de transparencia e bo goberno. No caso de que a entidade beneficiaria non atenda ao requirimento de información en prazo, procederase conforme ao establecido no artigo 4.4 da citada lei.

4. Sen prexuízo das obrigas establecidas nos apartados anteriores deben cumprir así mesmo as seguintes obrigas:

a) Achegar a, a proposta por cada colexio, os letrados designados para a mediación e as compensacións económicas derivadas da labor mediadora ao abeiro do programa.



b) Facer constar expresamente na formalización da prestación coas persoas seleccionadas o necesario cumprimento do establecido no convenio no que se refire aos horarios e duración do proceso de mediación, aos principios esenciais do proceso e mais ás incompatibilidades dos profesionais, os seus compromisos e a súa baixa .

c) Garantir a formación e capacitación das persoas que integren o servizo de mediación e exercer o control e supervisión da actividade incluso a través da responsabilidade disciplinaria, conforme a lexislación na materia.

d) Recadar o compromiso das/os avogadas/os dos Colexios profesionais que leven a cabo a mediación, ademais de a cumprir as obrigas establecidas no artigo 5 do Decreto 159/2003, do 31 de xaneiro, a:

d.1) Desenvolver o seu traballo de mediación con plena independencia e absténdose de intervir profesionalmente, á marxe da función mediadora, tanto a título profesional coma particular, no proceso que sexa obxecto de mediación, ou de asesorar as persoas que se someteron á súa mediación, tanto en asuntos de familia como en calquera outro.

d.2) Cumprir os requisitos de formación que para este efecto sexan esixidos polo Consello da Avogacía Galega.

d.3) Aceptar as encargas de mediación entre as partes nun proceso derivadas do protocolo de actuación previsto no convenio, non sendo que incorran nalgún dos supostos de incompatibilidade recollidos, caso en que serán substituídos/as polo/a suplente.

d.4) Cumprir os prazos establecidos no convenio en relación coa duración máxima do procedemento de mediación.

d.5) Respetar as disposicións existentes en materia de incompatibilidade.

d.6) Garantir a debida confidencialidade e segredo na súa actuación como mediadores.

d.7) Achegar, para a súa remisión á Consellería de Política Social e Xuventude como mínimo con carácter semestral, a ficha de recollida de datos relativos aos procesos de mediación realizados.

Cuarta. *Importe e condicións de pago.*

1. O investimento para o desenvolvemento do programa de mediación familiar intraxudicial é de oitenta mil euros (80.000,00€) para o ano 2023 con cargo á aplicación orzamentaria 13.02.312B.481.0 da Consellería de Política Social e Xuventude na que existe crédito adecuado e suficiente, segundo a Lei 6/2022, do 27 de decembro, de orzamentos xerais da Comunidade Autónoma de Galicia para o ano 2023.



Do investimento total indicado, corenta mil euros (40.000,00€) proceden da contribución da Vicepresidencia Primeira e Consellería de Presidencia, Xustiza e Deporte, cantidade previamente transferida á Consellería de Política Social e Xuventude.

Esta axuda é compatible con outras subvencións, axudas, ingresos ou recursos para a mesma finalidade procedentes de calquera Administración ou entes públicos ou privados, tanto que sexan nacionais coma da Unión Europea ou de organismos internacionais.

O importe das subvencións en ningún caso poderá ser de tal contía que, illadamente ou en concorrencia con outras subvencións, axudas, ingresos ou recursos, supere o custo da actividade subvencionada.

2. De conformidade co disposto no artigo 40.1.f) do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, o prazo de xustificación das actuacións desenvolvidas no marco deste convenio é o 22 de decembro de:2023

3. Consideraranse gastos subvencionables aqueles que de modo indubidable respondan á natureza da actividade subvencionada e se realicen no prazo establecido no convenio, de acordo co seguinte nivel de desagregación:

Concepto	Importe máximo
Remuneración das persoas mediadores	72.000 euros
Material de oficina	2400
Reprografía e comunicacións, incluídas as realizadas no entorno dixital	2800
Desprazamentos	2800
Total	80.000 euros

4. A remuneración do persoal mediador ten o límite máximo de 500 euros por cada proceso, no que se incluírán:

. Remuneración propiamente dita, que comprenderá todas as reunións, incluso a informativa ou previa, entrevistas, informes ou similar.

. IVE ou calquera imposto aplicable á remuneración

5. De acordo co artigo 29.2 da Lei 9/2007, do 13 de xuño, considérase gasto realizado o que foi efectivamente pagado con anterioridade á finalización do período de xustificación establecido no presente convenio.

6. A Consellería de Política Social e Xuventude fará o pago da mencionada cantidade ao Consello da Avogacía Galega do seguinte modo:



- Poderase facer un primeiro pagamento do 10% da contía total concedida, en concepto de anticipo, unha vez asinado o convenio de colaboración.
- O resto da contía total concedida, ata alcanzar o 80%, poderá facerse efectivo mediante pagamentos parciais á conta da liquidación definitiva na medida en que a entidade xustifique debidamente os gastos e os pagos realizados.
- O 20% restante farase efectivo unha vez presentada pola entidade a documentación final xustificativa do gasto realizado.

7. Antes de facerse efectivo ningún pago, de conformidade co establecido no artigo 11 do Decreto 11/2009, do 8 de xaneiro, o Consello da Avogacía Galega deberá acreditar que se atopa ao corrente das súas obrigas tributarias e fronte á Seguridade Social e que non ten pendente de pagamento ningunha outra débeda coa Administración Pública da Comunidade Autónoma.

No caso de que o solicitante denegue expresamente o seu consentimento para que o órgano xestor poida consultar e comprobar que se atopa ao corrente no cumprimento das ditas obrigas, deberá achegar os correspondentes certificados que a continuación se relacionan, ou ben presentar unha declaración de conformidade co artigo 31.7 da Lei 9/2007, do 13 de xuño:

- a) Certificación positiva de atoparse ao corrente no cumprimento das súas obrigas tributarias, expedida pola Axencia Estatal de Administración Tributaria.
- b) Certificación positiva de non ter contraída ningunha débeda de natureza tributaria coa Facenda Pública da Comunidade Autónoma, expedida pola Axencia Tributaria de Galicia.
- c) Certificación positiva de atoparse ao corrente no cumprimento das súas obrigas coa Seguridade Social, expedida pola Tesourería da Seguridade Social

Así mesmo, deberá presentar certificación da intervención ou do órgano que teña atribuídas as facultades de control da toma de razón en contabilidade e do cumprimento da finalidade para a que foi concedida a subvención, de acordo co establecido no artigo 28.5 da Lei 9/2007, do 13 de xuño .

8. Con ocasión da certificación final, o Consello Galego da Avogacía deberá presentar unha declaración complementaria do conxunto de axudas solicitadas, tanto das aprobadas ou concedidas coma das pendentes de resolución, para este mesmo programa das distintas administracións públicas competentes ou de calquera dos seus organismos, entes ou sociedades.

9. A compensación polos gastos de mediación para os profesionais cada un dos 7 Colexios de Avogados será de 11.428,57 euros. No obstante o dito importe poderá



incrementarse en función das compensacións internas co resto dos colexios ata o límite do importe total fixado no convenio para as actividades de mediación.

10. A Consellería de Política Social e Xuventude informará á Vicepresidencia Primeira e Consellería de Presidencia, Xustiza e Deportes da relación de pagos efectuados ao final do exercicio económico.

11. Procederá o reintegro parcial ou total dos fondos percibidos no suposto de incumprimento das condicións establecidas para a súa concesión, nos termos previstos no título II da Lei 9/2007, do 13 de xuño.

Así mesmo, ao amparo do disposto no artigo 14.1.n) da Lei 9/2007, do 13 de xuño, os criterios de gradación dos posibles incumprimentos para determinar a cantidade a minorar serán os seguintes:

a) O incumprimento total dos fins para os que se concedeu a axuda, da realización dos gastos subvencionables ou da obrigaón de xustificación dará lugar á perda do dereito ao cobramento ou, se é o caso, ao reintegro da totalidade da axuda concedida.

b) Calquera outro incumprimento parcial dos fins para os que se concedeu a axuda, incluíndo a realización parcial do investimento subvencionable ou da obriga de xustificación, dará lugar á perda do dereito ao cobro ou, se é o caso, á perda do dereito ao cobro na porcentaxe correspondente ao investimento non efectuado ou non xustificado.

c) A realización de modificacións non autorizadas no orzamento subvencionable supoñerá a perda do dereito ao cobro.

Quinta. Control.

O Consello da Avogacía Galega someterase ás actuacións de comprobación que a Consellería de Política Social e Xuventude lles poida requirir para a debida xustificación dos fins deste convenio, e en aplicación do artigo 40.1.h) do Decreto 11/2009, do 8 de xaneiro, obrígase a facilitar toda a información que lles sexa requirida pola Intervención Xeral da Comunidade Autónoma, polo Tribunal de Contas e polo Consello de Contas, no exercicio das súas funcións de fiscalización e control do destino das subvencións.

A Consellería de Política Social e Xuventude poderá solicitar en calquera momento os documentos que estime oportunos para a debida xustificación do gasto.

En todo caso, o Consello da Avogacía Galega deberá cumprir os requisitos sinalados no artigo 10 da Lei 9/2007, do 13 de xuño, para poder ser beneficiario das axudas, así como as obrigas establecidas no artigo 11 da mesma lei.



Unicamente para efectos estadísticos, o Consello da Avogacía Galega informará trimestralmente á Consellería de Política Social e Xuventude sobre os procedementos de mediación realizados , comunicando o número de mediacións, a duración de cada unha delas, o resultado final dos procedementos e os xulgados de procedencia.

Sexta. Transparencia e bo goberno

Este convenio será obxecto de publicación e inscrición, de acordo co previsto no artigo 17 da Lei 1/2016, do 18 de xaneiro e no Decreto 126/2006, do 20 de xullo, polo que se regula o Rexistro de Convenios da Xunta de Galicia.

Así mesmo, será obxecto de publicación e inscrición de conformidade co previsto nos artigos 15 e 16 da Lei 9/2007, do 13 de xuño e no Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006.

De conformidade coa Lei 38/2003, do 17 de novembro, o instrumento de colaboración e a información sobre a subvención serán comunicados á Base de Datos Nacional de Subvencións.

As partes asinantes do convenio manifestan o seu consentimento para que os datos persoais que constan neste convenio, así como o resto das especificacións contidas nel poidan ser publicadas no Portal de Transparencia e Goberno Aberto.

Sétima. Información básica sobre datos de carácter persoal

As partes asinantes deste convenio garantirán a confidencialidade dos datos persoais aos que teñan acceso como consecuencia das actuacións realizadas en execución deste e de conformidade co disposto na Lei orgánica 3/2018, do 5 de decembro, de protección de datos persoais e garantía dos dereitos dixitais e no Regulamento (UE) 2016/679 do Parlamento Europeo e do Consello, do 27 de abril de 2016, relativo á protección das persoas físicas no que respecta ao tratamento de datos persoais e a libre circulación de estes datos e polo que se derroga a Directiva 95/46/CE (Regulamento xeral de protección de datos).

Os datos persoais recadados neste procedemento serán tratados na súa condición de responsable pola Xunta de Galicia-Consellería de Política Social e Xuventude coa finalidade de levar a cabo a tramitación administrativa derivada da xestión da concesión directa a través deste convenio que comprende verificar os datos e documentos que a entidade interesada achegue para comprobar a exactitude destes, levar a cabo as actuacións administrativas que se deriven e informar sobre o estado de tramitación.



O tratamento dos datos baséase no cumprimento dunha misión de interese público ou no exercicio de poderes públicos, conforme ás referencias recollidas no enlace <https://www.xunta.gal/información-xeral-proteccion-datos>, derivada dunha competencia legalmente atribuída ao responsable do tratamento, así como o cumprimento das obrigas legais impostas ao dito responsable de conformidade co disposto no artigo 6.1, letras c) e e) do Regulamento (UE) 2016/679 do Parlamento Europeo e do Consello, do 27 de abril de 2016 e o artigo 8 da Lei orgánica 3/2018, do 5 de decembro, e en concreto a competencia e obrigas previstas nos preceptos básicos da Lei 38/2003, do 17 de novembro, da Lei 9/2007, do 13 de xuño, na Lei 39/2015, do 1 de outubro, na Lei 1/2016, do 18 de xaneiro e na Lei 4/2019, do 17 de xullo, de administración dixital de Galicia. Con todo, determinados tratamentos poderán fundamentarse no consentimento das persoas interesadas, reflectíndose esta circunstancia de conformidade coa normativa de aplicación.

A referencia a publicidade, en cumprimento da normativa de transparencia e subvencións, axustarase a dita normativa e coas limitación que esta establece.

Como destinatarios, os datos serán comunicados ás administracións públicas no exercicio das súas competencias, cando sexa necesario para a tramitación e resolución dos seus procedementos ou para que os cidadáns poidan acceder de forma integral á información relativa a unha materia.

As persoas interesadas poderán solicitar o acceso, rectificación, oposición, limitación, portabilidade e supresión dos seus datos ou retirar, no seu caso, o consentimento outorgado a través da sede electrónica da Xunta de Galicia, ou nos lugares e rexistros establecidos na normativa reguladora do procedemento administrativo común, segundo se recolle en <https://www.xunta.gal/exercicio-de-dereitos>. O contacto coa persoa delegada de protección de datos e máis información consultarase no enlace <https://www.xunta.gal/proteccion-datos-persoais>.

Oitava. Comisión de seguimento do convenio.

De conformidade co disposto no artigo 49.f) da Lei 40/2015, do 1 de outubro, do réxime xurídico do sector público, crearase un órgano mixto de vixilancia e control da execución e aplicación deste convenio e de resolución de controversias administrativas.

Este órgano estará integrado polos seguintes membros:

- A persoa titular da Dirección xeral de Familia, Infancia e Dinamización Demográfica, que exercerá a presidencia da comisión e poderá ser suplido de acordo co establecido no Decreto 124/2022, do 23 de xuño, polo que se establece a estrutura orgánica da consellería de Política Social e Xuventude.



- A persoa titular da Dirección xeral de Xustiza, que poderá ser suplido de acordo co establecido no Decreto 117/2022, do 23 de xuño polo que se establece a estrutura orgánica da Vicepresidencia Primeira e Consellería de Presidencia, Xustiza e Deportes
- A presidenta do Consello da Avogacía Galega ou persoa que exerza a suplencia de acordo cos seus estatutos.

Actuará como secretario/a, con voz pero sen voto, unha persoa funcionaria da Subdirección Xeral de Política Familiar, Infancia e Adolescencia da Dirección Xeral de Familia, Infancia e Dinamización Demográfica.

A comisión reunirse de forma ordinaria cada tres meses co obxecto de garantir a calidade do servizo, corrixir disfuncionalidades e analizar a experiencia e con carácter extraordinario, cando sexa necesario, tras pedimento de calquera das partes. Para tales efectos a comisión poderá requirir a presenza do equipo mediador

Esta comisión rexerase en canto a súa constitución, funcionamento e adopción de acordos pola normativa vixente en materia de órganos colexiados na Lei 40/2015, do 1 de outubro, e na sección 3º do capítulo primeiro do Título I da Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

Novena. *Vixencia do convenio.*

A vixencia do presente convenio será a comprendida entre a súa sinatura e o 31 de decembro de 2023 non obstante, abranguerá os gastos das accións obxecto do programa que se realicen desde o 1 de xaneiro de 2023.

Décima. *Natureza xurídica e cuestións litixiosas.*

O presente convenio ten natureza administrativa e rexerase polas cláusulas establecidas nel, e á falla destas, polo regulado na Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014 e a Lei 40/2015, do 1 de outubro, de réxime xurídico do sector público. Rexerase, así mesmo, pola Lei 9/2007, do 13 de xuño, e mais polo Decreto 11/2009, do 8 de xaneiro.

A Administración gozará de todas as prerrogativas inherentes á natureza administrativa do convenio.

Correspóndelle á Administración a resolución das cuestións litixiosas que poidan xurdir sobre a interpretación modificación, resolución ou efectos do presente convenio e os seus acordos poñen fin á vía administrativa.

Contra estes acordos poderá interpoñerse recurso de reposición no prazo dun mes a partir do día seguinte ao da súa notificación, se o acordo fóra expreso. Se non o fóra,



poderase interpoñer o recurso de reposición en calquera momento a partir do día seguinte a aquel en que, de acordo coa súa normativa específica, se produza o acto presunto, tal e como establece o artigo 124 da Lei 39/2015, do 1 de outubro.

De conformidade co disposto na Lei 29/1998, do 13 de xullo, reguladora da xurisdición contencioso-administrativa, procederá a impugnación directa ante o Tribunal Superior de Xustiza ou órgano contencioso-administrativo competente, no prazo de dous meses a partir do día seguinte ao da súa notificación se o acto é expreso e de seis meses a partir do día seguinte a aquel en que se produza o acto presunto.

Décimo Primeira. Resolución do convenio.

Darán lugar á resolución do presente convenio as causas previstas no artigo 52 da Lei 40/2015, do 1 de outubro, e as que a continuación se relacionan, segundo o establecido no artigo 33 da Lei 9/2007, do 13 de xuño, feito que motivará o reintegro total ou parcial da axuda percibida e dos xuros de mora devindicados desde o momento do seu pago ata a data en que se acorde a procedencia do reintegro:

- Mutuo acordo das partes asinantes.
- Incumprimento das cláusulas do convenio por algunhas das partes asinantes.
- Resistencia, escusa, obstrución ou negativa ás actuacións de comprobación e control financeiro, así como incumprimento das obrigas contables.

E en proba de conformidade con canto antecede e para a debida constancia, asínase o presente convenio de colaboración, no lugar e data da sinatura dixital.

POLA XUNTA DE GALICIA	POLO CONSELLO DA AVOGACÍA GALEGA
VICEPRESIDENCIA PRIMEIRA E CONSELLERÍA DE PRESIDENCIA, XUSTIZA E DEPORTES	O presidente
O Vicepresidente primeiro e Conselleiro de Presidencia, Xusta e Deportes Diego Calvo Pouso	Augusto José Pérez-Cepeda Vila
CONSELLERÍA DE POLÍTICA SOCIAL E XUVENTUDE	
A Conselleira de Política Social e Xuventude Fabiola García Martínez	

